

Reglur um götusölu og útimarkaði í landi Hafnarfjarðarbæjar

1. gr.

Gildissvið

Reglur um götusölu og útimarkaði taka til hvers konar sölustarfsemi sem fer fram utanhúss og á almannafæri, s.s. á torgum götum, gangstéttum og opnum svæðum.

2. gr.

Leyfisskyld starfsemi

Götusala og útimarkaðir eru leyfisskyldir og eru leyfi gefin til ákveðins tíma.

Minniháttar góðgerðarsölur, s.s. tombólur barna og ungmenna, eru ekki leyfisskyldar samkvæmt reglum þessum. Önnur sala, sem hvorki krefst yfirbyggingar né sérstakrar aðstöðu að neinu leyti, t.d. dagblaðasala eru heldur ekki leyfisskyldar samkvæmt reglum þessum. Ávallt ber þó að gæta hreinlætis og er söluaðila skylt að sjá til þess að umhverfi sölusvæðis sé ávallt haldið hreinu.

Skipulags- og byggingarsvið er umsjónaraðili götusölu og útimarkaða og sér um framkvæmd leyfisveitinga, eftirlit og upplýsingagjöf. Leyfisveiting byggir á mati umsókna þar sem gerð er grein fyrir sölustarfsemi og umgjörð hennar, vöruvali, sölutíma, staðsetningu og útliti söluvagns eða söluborðs.

Forsendur fyrir notkun á opinberum svæðum er að björgunar-/viðbragðsaðilar hafi ávallt greiðan aðgang og viðunandi starfsskilyrði. Leyfishafi skal ávallt skila sölusvæði hreinu og mögulegar skemmdir á svæðinu verða lagfærðar af umhverfis- og framkvæmdasviði og á kostnað viðkomandi leyfishafa.

Leyfi fyrir götusölu og útimarkað er ekki hægt að framselja eða framleigja. Þó er heimilt að veita einstökum deildum bæjarins almennt leyfi vegna tiltekinna viðburða sem unnt er að framselja til einstaklinga/lögaðila t.d. vegna Jólaborps og 17. júní hátíðarhalda.

Handhafi leyfis fyrir götusölu eða útimarkað skal greiða leyfisgjald sem kveðið er á um í samningi milli leyfishafa og leyfisveitanda við afhendingu leyfis.

Götusala og útimarkaðir mega ekki skerða öryggi og aðgengi gangandi, hjólandi og akandi umferðar, né byrgja glugga rekstraraðila á svæðinu. Lágmarksfjarlægð frá inngangi rekstraraðila eru 7 metrar.

Leyfishafa er óheimilt að stunda götusölu eða vera með útimarkað annars staðar en leyfið kveður á um og taka meira pláss en skilgreint er samkvæmt leyfi.

3. gr.

Umsóknarferli

Umsókn um afnot af opinberu svæði vegna götusölu eða útimarkaðs skal send til skipulags- og byggingarsviðs í síðasta lagi 14 dögum áður en starfsemi skal hefjast. Umsóknin skal lögð fyrir afgreiðslufund skipulags- og byggingarfulltrúa til umsagnar.

Við afhendingu umsóknar skal umsækjandi tilgreina ósk um staðsetningu, gildistíma og tímaramma, fylgja skal mynd af söluvagni/bás/borði og upplýsingar um stærð og þyngd.

Ef sótt er um stöðuleyfi til lengri tíma en tveggja mánaða skal vísa umsókn til byggingarfulltrúa til afgreiðslu í samræmi við gr. 2.6.1 í byggingarreglugerð.

4. gr.

Staðsetning og tími

Skipulags- og byggingarsvið ákvarðar staðsetningu, stærð svæðis og tímaramma fyrir götusölu og útimarkaði. Ekki er gert ráð fyrir tengingum við veitukerfi, svo sem vatnsveitu eða rafveitu.

5. gr.

Umgengni

Leyfishafa er skylt að sjá til þess að umhverfi sölusvæðis sé ávallt haldið hreinu.

Engin ummerki skulu vera um starfsemina utan þess tíma sem skilgreindur er samkvæmt leyfi.

Verði misbrestur á þessu getur skipulags- og byggingarsvið látið fjárlægja söluvagna, - borð eða -bása eða hreinsa sölusvæðið á kostnað leyfishafa.

6. gr.

Útlit og merkingar

Gerð er sú krafa að útlit söluvagns/söluborðs fari vel í umhverfinu, að efnisnotkun, ásýnd og yfirbragð sé vandað og við hæfi á þeim stað sem salan á að eiga sér stað. Ekki er heimilt að nota bíla, húsbíla eða hjólhýsi sem söluaðstöðu en skipulags- og byggingarsviði er þó heimilt að veita undanþágu frá því í sérstökum tilvikum.

Óheimilt er að setja upp hvers konar auglýsingaskilti og merkingar á söluvagn, -borð, eða -bás eða nema í því skyni að auðkenna viðkomandi sölustarfsemi.

Allt sem viðkemur sölustarfseminni skal staðsetja innan þess svæðis sem leyfið kveður á um og í samræmi við skilmála þess.

Leyfishafi þarf að vera tilbúinn að framvísa leyfi til götusölu eða útimarkaðar ef þess bær yfirvöld óska þess.

7. gr.

Lok og afturköllun leyfis

Leyfi samkvæmt reglum þessum getur hvenær sem er verið afturkallað, að undangenginni viðvörun, ef ákvæði reglna þessara og leyfis hafa verið brotin án endurgreiðslu leyfisgjalds.

Þegar leyfi rennur út eða er afturkallað hvílir sú kvöð á leyfishafa að fjarlægja strax alla fylgihluti og innréttingar. Ef verkið er ekki unnið innan tilgreinds tímafrests áskilur skipulags- og byggingarsvið sér rétt til að framkvæma þá vinnu á kostnað viðkomandi leyfishafa.

8. gr.

Útimarkaðir á vegum annarra en Hafnarfjarðarbæjar

Aðilar sem ætla að standa fyrir útimarkaði, t.d. í tengslum við hina ýmsu viðburði, skulu senda umsókn til skipulags- og byggingarsviðs þar sem tilgreindur er ábyrgðaraðili og fram skal koma í umsókn skilgreining á svæði sem sótt er um til afnota. Reglur þessar gilda um útimarkaði og sölustarfsemi sem viðkomandi aðilar standa fyrir og bera þeir ábyrgð á að þátttakendur fari eftir reglum þessum.

9. gr.

Aðrar reglur og yfirvöld

Götusala og útimarkaðir lúta gildandi lögum og reglum sem ná yfir starfsemina og umgjörð hennar. Í þeim tilvikum sem starfsemin krefst frekari leyfa en leyfis frá sveitarfélaginu fyrir götusölu eða útimarkaði skal leyfisumsækjandi afla þeirra.

Reglur þessar sem settar eru með stoð í lögreglusamþykkt Hafnarfjarðar voru samþykktar í bæjarstjórn Hafnarfjarðar þann 29. ágúst 2012.